



UMP kibar Jalur Gemilang semarakkan Sambutan Bulan Kemerdekaan Ke-55

Bagi menyemarakkan Sambutan Bulan Kemerdekaan ke-55 pada tahun ini, Universiti Malaysia Pahang (UMP) berjaya mengagihkannya sebanyak 500 Jalur Gemilang di setiap jabatan dan fakulti di kedua-dua kampus Gambang dan Pekan sempena Majlis Pelancaran Sambutan Bulan Kemerdekaan dan Penyerahan Jalur Gemilang yang diadakan di Dewan Tun Fatimah Kompleks Pentadbiran Utama pada 8 Ogos 2012 yang lalu.

Selain menjayakan Kempen Kibarkan Jalur Gemilang di pejabat dan persekitaran kampus, UMP turut memperkenalkan beberapa program yang mengajak warga universiti menghayati semangat kemerdekaan dengan penganjuran Pertandingan Menghias Ruang Pejabat dengan Jalur Gemilang, Forum Kemerdekaan, Pertandingan Pantun Kenegaraan, Bicara Merdeka, majlis solat hajat dan khidmat komuniti.

Pendaftar UMP, Haji Mustafa Ibrahim berkata, penganjuran majlis sambutan ini memberi peluang kepada warga universiti untuk mensyukuri nikmat keamanan, kemakmuran dan

kesejahteraan apatah lagi pada bulan Ramadan yang penuh keberkatan ini.

“Aktiviti ini merupakan cara paling mudah untuk meluahkan semangat sayangkan negara dan sebagai rakyat Malaysia kita patut bersyukur berada di negara yang bebas kemiskinan dan tidak berdepan dengan peperangan,” katanya.

Katanya, program Bual Bicara juga turut diadakan pada 7 September yang menyaksikan Naib Canselor UMP, Profesor Dato’ Dr. Daing Nasir Ibrahim bertindak sebagai moderator manakala ahli panel terdiri daripada bekas Penglima Medan Tentera Darat Malaysia, Leftenan Jeneral (B) Dato’ Seri Zaini Mohamad Said dan bekas Timbalan Ketua Polis Negara, Tan Sri Shamsuri Arshad.

Sebagai penutup bulan sambutan kemerdekaan ini, telah diadakan Festival Layang-layang anjuran UMP dengan kerjasama Persatuan Pelayang Pahang dan Exco Pelancongan, Kesenian dan warisan Negeri Pahang. Antara pengisian termasuklah bengkel penyediaan layang-layang, pameran dan pertandingan menaikkan layang-layang yang diadakan di UMP kampus Pekan.

